

Pemimpin BN Perlu Bijak Manfaatkan ICT Perjelas Isu - Heng Seai Kie
Bernama
01 November, 2012

PUTRAJAYA, 1 Nov (Bernama) -- Para pemimpin Barisan Nasional (BN) terutamanya di peringkat akar umbi mestilah bijak memanfaatkan teknologi maklumat dan komunikasi (ICT) untuk memberi penjelasan mengenai sesuatu dasar dan isu, kata Naib Pengerusi Wanita MCA Datuk Heng Seai Kie.

Beliau berkata BN perlu melipatgandakan usaha untuk menguasai bidang ICT khususnya teknologi media baru bagi menghadapi peperangan maya dan serangan pembangkang, yang melibatkan isu-isu berbangkit dan fakta diputar belit.

"Politik hari ini adalah satu peperangan yang berasaskan kepada persepsi rakyat dan di zaman teknologi yang banyak menggunakan kemudahan ICT, siapa yang mahir menggunakan saluran ICT akan mempunyai kelebihan untuk mempengaruhi minda pengguna Internet yang majoritinya golongan muda dan remaja," katanya kepada Bernama.

Heng berkata pemimpin BN perlu segera bertindak memberi penjelasan tentang dasar-dasar yang dilaksanakan kerajaan dan menjawab isu-isu serta memperbetulkan fakta bagi mengelak minda rakyat terus terpesong.

Jika dibiarkan, ia akan memberi kelebihan kepada pembangkang untuk meracuni dan memesongkan pemikiran rakyat berhubung sesuatu isu, katanya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=706191>